

Joselin Croes (POR):

Mester bin cu cambio den nos maneho di admision di stranhero pa asina proteha e mercado laboral na Aruba

ORANJESTAD - E problema di e fluho incontralabel y irresponsabel di stranheronan cu ta dren ta nos isla tur aña pa bin biba y traha na Aruba ta un problema grandi y urgente cu mester wordo atendi di un forma urgente y di biah.

Na februari di aña 2014 DIMAS a publica e maneho nobo di admision pa stranhero pa tur stranhero cu kier bin biba y traha na Aruba (Herziene Toelatingsbeleid Vreemdelingen Ministerie Ruimtelijke Ontwikkeling, Infrastructuur en integratie, Aruba, 1 februari 2014). Entre februari 2014 te cu awe a bin hopi cambio den e maneho aki riba menciona, sin cu esakinan a wordo publica den corant of riba website di DIMAS cu consecuencia cu tin hopi inseguridad y inconsistencia di e maneho aplicabel na DIMAS y sin cu e trahadonan na DIMAS a wordo instrui of informa corectamente encuanto e tur e cambionan aki cu consecuencia cu hopi fout ta wordo haci cu e permisionan na DIMAS.

Maneho di admision

Conforme e maneho di admision actual tur persona cu tin tres permiso di trabou valido no tin nodo di bay DPL mas y nan por bay directamente DIMAS pa pidi un permiso di trabou hasta si esaki ta trata di un cambio di trabou.

Reunificacion familiar

Conforme e maneho pa reunificacion familiar, tur stranhero cu tin tres permiso valido por pidi un prome permiso pa reunificacion familiar pa su casa y su yiunan.

O sea, si 3 aña pasa 1000 persona a haya un prome permiso na Aruba e aña aki nan por aplica pa permiso pa nan casa y nan yiunan. Ban asumi cu esakinan ta famianan di 1 casa y dos yiu, e ora nos ta papiando di un total di 3000 persona cu por emigra como familiar pa aña na Aruba.

Tipo di permiso

Un otro tipo di permiso cu ta wordo hopi maluz ta esun di inversionista. E stranhero cu kier aplica pa un permiso di inversionista, mester comproba cu e tin 40% di accion (40 % shares) den e compania. E stranhero ta busca un stroman pa keda cu 60% di e accionnan (shares) den e compania, e ta pag'e algo pa luna pa esaki pero e doño real mes ta e stranhero.

E persona local cu ta fungi como accionista tambe hopi biah ta fungi como director y no ta realiza cu e ta responsabel pa e compania aki legalmente. E maneho actual di admision no ta existi ningun tipo di comprobante cu e compania aki realmente ta existi ni tampoco ta existi un comprobante di e inversion cu e compania aki lo haci na Aruba. Esaki ta crea e posibilidad pa tin companianan spoki (ghost) cu en realidad no ta ni opera djis pa e persona por haya un permiso. E otro problema cu esaki ta crea ta cu e ta habri e posibilidad pa stranhero tuma over e trabounan di un Rubiano of di un persona cu tin permiso pa biba y traha aki. E inversionista tin derecho pa aplica pa reunificacion familiar pa full su famia cual tambe tin como consecuencia un entrada grandi di mas stranhero na Aruba.



Declaracion directora di Censo

Segun declaracion di directora di Censo tin mas o menos 11.000 persona registra na Censo, di cual Censo no ta sigur si nan realmente ta biba na Aruba of nan a bay biba otro caminda, ni tampoco tin seguridad cu e personanan aki tin un permiso valido den nan man. E problema di esaki ta cu segun nos leyman tur persona cu ta registra na Censo tin derecho riba AZV, siendo cu kisas e personanan aki no tin permiso valido local muy probablemente kieren cu nan ta trahando ilegal na Aruba, kieren nan no ta paga ni belasting ni AZV pero si nan ta haci uzo di dje si. Esey kieren cu nos tur e clase trahado na Aruba ta pagando AZV pa tur e personanan aki cu ta ilegal na Aruba pero keto bay registra na Censo. E ta di aplaudi cu Censo ta haciendo un control riguroso riba esaki.

Mi no tin nada contra di inversionista cu ta inverti grandemente na Aruba den proyectonan grandi cu ta crea hopi cupo di trabou pa local, esaki nan ta 'more than wel-

come.' As a matter of fact, esakinan merece un trato preferencial pa asina nan no tin nodo di warda 9 luna pa un permiso. Mescos ta conta pa e rentista cu tambe por bin biba cu su famia. Esakinan tambe ta bon bini, pasobra nan ta biba den condominium, nan yiunan ta atende scolnan priva na Aruba y nan no tin derecho di traha, kieren nan no ta pisa riba nos mercado laboral.

Manera cu boso por mira, nos leyman di admision ta haci esey posibel pa nos keda haya un avalancha di persona cu por bin biba y traha na Aruba. Esaki tin consecuencia grandi riba nos mercado laboral, economia, seguro medico, y nos scolnan. Gobierno di Aruba mester realiza cu si nan no bin cu un plan di maneho a corto plazo pa para e fluho incontralabel di emigrante cu kier bin biba y traha na Aruba, algun di un forma legal y algun di un forma ilegal, esaki lo tin consecuencia devastador pa Aruba.

Actualmente casi tur klas na Aruba tin mas di 30 mucha. Esaki ta demasiado mucha pa un klas, sin papia di e prob-

lema di idioma pa e hoben cu no por papia Papiamentu cu Hulandes. Aruba su AZV no por carga mas peso di mas hende. No tin suficiente cas di pueblo pa e clase trahado. Nos careterenan ta yen. Tin hopi cas unda tin mas di 4 famia ta biba den un cas. Ultimamente tin hasta hende ta bibando bou palapa na beach. Pero ainda no a bin cu un paro pa emigrante bin biba na Aruba.

E consecuencia di no bin cu un paro na emigracion y na e crecimiento di e poblacion desproporcional, ta cu e nivel di educacion ta bay baha pa motibo cu tin mas y mas mucha den un klas, nan no conoce e idioma di Papiamentu ni Hulandes cual ta kita hopi atencion di e maestro.

E otro problema ta cu, door cu no tin suficiente cas social na Aruba hopi famia ta haya nan ta comparti cas y bo ta haya hasta 3 pa 4 famia bibando hunto den un cas, cual no ta sano pa ningun hogar. E otro problema ta cu ora e economia stagna y e companianan bay bancarota y nan manda nan hendenan cas, e desempleo ta bay tin como efecto ladronia y mas criminalidad.

Mester bin cambio den nos ley di admision cu ta stop e avalancha di stranhero cu ta bin emigra pa Aruba. E realidad ta cu Aruba a conoce un paro den e ultimo añanan di inversionnan grandi. No a bin ningun hotel nobo y, excepto CITGO, no a bin ningun compania grandi cu e crea hopi cupo di trabou. No tin necesidad pa sigui duna permiso pa por traha y biba na Aruba. Mester ta cauteloso ken y cuanto persona mas nos ta laga dreña Aruba pa biba y traha.

E problema aki ta uno grandi y uno urgente y si nos no proteha nos isla, pronto nos lo wordo sacudi cu avalancha di criminalidad y problemanan social cu lo tin un efecto negativo riba nos turismo cu ta nos unico pilar economico awor. Mester trece cambio den e maneho di admision, mester haci esey mas estricto y exigente pa asina nos por proteha e mercado laboral y nos scolnan di Aruba.

Visit the Aruban Donkey Sanctuary

Soft drinks and ice cream on the terrace.
Roaming donkeys in their habitat.

Open daily from 9am until 4pm
In the weekends from 10am until 3pm

How to get there and for more information:
www.arubandonkey.org
or call 593 2933

FREE ENTRANCE